

TRIDESET UZROKA ULASKA U DŽENNET

Autor:

Dar Ibnu-l-Mubarek lin-nešri vet-tevzi‘i

Uvod

Zaista hvala pripada Allahu, Njega hvalimo i od Njega pomoć i oprost tražimo. Utječemo se Allahu, od zla nas samih i od naših loših djela. Koga Allah dž.š. uputi niko ga u zabludu ne može odvesti, a koga On u zabludi ostavi nema mu upućivača. Svjedočim da nema boga sem Allaha, Jedinog, koji nema saučesnika, i svjedočim da je Muhammed Njegov rob i poslanik A zatim:

Ova knjižica, pod nazivom Trideset uzroka ulaska u Džennet, u sebi sadrži jedan broj ajeta i vjerodostojnih (sahih) hadisa, u kojima se spominju djela koja su uzrok da njihov počinilac, Allahovom dobrotom, uđe u Džennet. Međutim, to ne znači da ova djela, onom ko ih čini, garantuju ulazak u Džennet, bez razlike kakvo mu je vjerovanje.

U Džennet neće ući niko do mu'min. Kada bi neko od kafira (nevjernika) ili mušrika (idolopoklonika), činio ova djela ili neka od njih, to mu ne bi koristilo, niti bi ga uvelo u Džennet, jer Uzvišeni Allah kaže: Ako budeš druge Allahu ravnim smatrao (činio širk), tvoja djela će sigurno propasti, a ti ćeš izgubljen biti. (Ez-Zumer, 65.)

Također, Uzvišeni o kafirima (nevjernicima) kaže: Mi ćemo pristupiti djelima njihovim koja su učinili, i u prah i pepeo ih pretvoriti. (El-Furkan, 23.)

Zbog toga je islam prvi nezaobilazni šart (uvjet) za primanje bilo kojeg dobrog djela. Što se tiče drugog šarta (uvjeta), koji obavezno mora pratiti djelo, da bi bilo primljeno kod Uzvišenog Allaha U, to je ihlas (iskrenost) u djelima prema Allahu U, tj. onaj koji radi neko djelo obavezan je da time namjerava (cilja) Allahovo lice bez toga da u svojoj namjeri Allahu dž.š. pridružuje nekoga od stvorenja. Dokaz za ovo su riječi Poslanika s.a.v.s.: “Zaista Uzvišeni Allah ne prima nikakvo djelo, osim ako je urađeno sa ihlasom (iskreno) i ako se njime želi Allahovo lice (zadovoljstvo). (bilježi ga Nesaija, Sahihul-džami‘, 1856)

Treći šart (uvjet) za primanje djela je slijeđenje Poslanika s.a.v.s. Zbog toga smo se u ovoj knjižici ograničili samo na vjerodostojne hadise od Poslanika s.a.v.s..

Molim Uzvišenog i Moćnog Allaha, Njegovim lijepim imenima i savršenim svojstvima, da učini ovo i sva druga naša djela iskrenim (sa ihlasom), radi Njegovog uzvišenog lica (zadovoljstva).

Također Ga molim da ovo djelo bude od koristi meni i svoj braći muslimanima, te da ga upiše meni i mojim roditeljima kao nagradu, na dan kada neće koristiti ni imetak ni sinovi, osim onome ko dođe Allahu s čistim srcem. Ako sam pogodio to je od Allaha i Njegovom dobrotom, a ako sam pogriješio to je od mene i od šejtana.

Slavljen i hvaljen, neka si, Gospodaru. Svjedočim da nema boga osim Tebe, od Tebe oprost tražim i kajem Ti se. Neka je Allahov salavat na Njegova roba i poslanika, Muhammeda s.a.v.s., njegovu porodicu i sve njegove ashabe. Naša posljednja dova je: **HVALA ALLAHU, GOSPODARU SVJETOVA.**

BISMILLAHIRRAHMANIRRAHIM

TRIDESET UZROKA ULASKA U DŽENNET, IZ KUR'ANA I VJERODOSTOJNOG SUNNETA.

1. 2. IMAN I DOBRO DJELO

U plemenitom Kur'anu IMAN se spominje kao jedan od najvažnijih uzroka koji, Allahovom dozvolom, vode u Džennet, ali se uvijek spominje uporedo s dobrim djelom. Zbog toga ne možeš naći ni jedno mjesto, gdje se spominje IMAN, kao uzrok ulaska u Džennet, a da se uporedo s njim ne spominje i dobro djelo. Vrata dobrih djela su, hvala Allahu, prostrana i velika, a putevi i načini postizanja nagrade su veliki i mnogobrojni. Njihov broj zna samo Uzvišeni Allah U.

Uzvišeni Allah dž.š. kaže: A oni koji budu vjerovali i dobra djela činili - oni će stanovnici Dženneta biti i u njemu će vječno ostati. (El-Bekare, 82.)

U ovom značenju postoji mnogo ajeta i vjerodostojnih hadisa, koje je teško pobrojati, ali ćemo kao primjer navesti neke od njih.

SURE: El-Bekare, 25. i 82.; Lukman, 8.; El-Kehf, 107.; El-Hadždž, 14., 23., 56.; El-Feth, 5.; El-Hadid, 12. i 21.; Et-Tegabun, 9.; Et-Talak, 11.; El-Burudž, 11.; El-Bejjine, 7.; El-Mu'minun, 1. i 11.; El-Ankebut, 57.

3. TAKWA - BOGOBOJAZNOST

Jedna od najvažnijih definicija bogobojaznosti je: Bogobojaznost je strah od Uzvišenog, rad po objavljenom, zadovoljstvo s malo i spremnost za dan odlaska.

U definicije bogobojaznosti ulazi i sljedeća definicija: Bogobojaznost je da radiš iz pokornosti prema Allahu U, po nuru od Allaha dž.š. (tj. onako kako je došlo u Allahovoj knjizi i Sunnetu Poslanika s.a.v.s.), želeći time nagradu od Allaha, i da ostaviš nepokornost prema Allahu U, po nuru (svjetlosti) od Allaha, bojeći se Njegove kazne.

Ko želi da pročita nešto opširnije o bogobojaznosti neka vidi djela od Ibnul-Kajjima, rehimehullah,: Medaridžus-salikin; Iğasetullehfan.

Uzvišeni Allah kaže: Oni koji budu bogobojazni, oni će u džennetskim baščama, pored izvora, biti. (El-Hidžr, 45.)

Džennet je i pripremljen za bogobojazne. Uzvišeni kaže: I požurite ka oprostima od Gospodara vašeg, i Džennetu koji je prostran kao nebesa i Zemlja, pripremljen za bogobojazne. (Ali 'Imran, 133.)

Kaže Poslanik s.a.v.s.: "Ono što će najviše uvesti ljude u Džennet je bogobojaznost prema Allahu i lijep ahlak (ponašanje), a ono što će ih najviše uvesti u vatru (Džehennem) je jezik i stidno mjesto." (Tirmizija, Ibn Madždže i Ahmed, Silsiletul-ehadisus-sahiha, 977.)

4. POKORNOST UZVIŠENOM ALLAHU I NJEGOVOM POSLANIKU s.a.v.s.

Uzvišeni Allah kaže: Onoga ko se pokorava Allahu i Poslaniku Njegovu On će u džennetske bašče, kroz koje rijeke teku uvesti, a onoga ko leđa okrene, bolnom kaznom će kazniti. (El-Feth, 17.)

U Buharijinom Sahihu se bilježi hadis od Ebu Hurejre r.a. da je Poslanik s.a.v.s. rekao: "Svi sljedbenici moga Ummeta će ući u Džennet osim ko odbije. "A ko odbija, Božiji Poslaniče?" -rekoše. "Onaj ko mi se pokorava ući će u Džennet, a onaj ko je nepokoran on odbija." (Fethul-bari, komentar Buharijinog Sahiha, 13/249)

5. DŽIHAD NA ALLAHOVOM PUTU

Pod džihadom na Allahovom putu se podrazumjeva borba životom i imetkom. Uzvišeni Allah kaže: Allah je od mu'mina kupio živote njihove i imetke njihove u zamjenu za Džennet koji će im dati - oni će se boriti na Allahovom putu, pa ubijati i biti ubijani. On im je to istinski obećao u Tevratu i Indžilu i Kur'anu... (Et-Tewba, 111.)

Također Uzvišeni kaže: O vjernici, hoćete li da vam ukažem na trgovinu koja će vas spasiti bolne kazne; u Allaha i Poslanika Njegova vjerujte, i imecima svojim i životima svojim na Allahovom putu se borite - to vam je, da znate, bolje -, On će vam grijehе vaše oprostiti i u džennetske bašče vas, kroz koje rijeke teku, uvesti, i u divne dvorove u edenskim vrtovima; - to će biti veliki uspjeh. (Es-Saff, 10.-12.)

6. TEWBA - POKAJANJE

Tewba briše (eliminise) sve ono što je bilo prije nje (misli se na loša djela), kako kaže Poslanik s.a.v.s.: "Onaj koji se pokaje od grijeha je kao i onaj ko nema grijeha." (bilježe ga Ibn Madždže i drugi, Sahihul-džami', 3008)

Allah dž.š. kaže: ...ali oni koji su se pokajali i vjerovali i dobro činili, njima se neće nikakva nepravda učiniti i oni će u Džennet ući. (Merjem, 60.)

7. USTRAJNOST (POSTOJANOST) NA ALLAHOVOJ VJERI

Kaže Uzvišeni Allah: Oni koji govore: "Naš Gospodar je Allah!" - zatim ustraju, neka se ničega ne boje i ni za čime nek ne tuguju. (El-Ahkaf, 13.)

Od Sufjana ibn Abdullaha es-Sekafije se prenosi da je rekao: "Božiji Poslaniče, reci mi nešto o islamu, nakon čega, o njemu, neću nikog pitati poslije tebe!" Poslanik mu reče: "Reci: Amentu billahi (vjerujem u Allaha), zatim ustraj u tome." (bilježi Muslim, komentar od Newewija 2/367).

8. TRAŽENJE ZNANJA (NAUKE) RADI ALLAHOVOG U LICA (ZADOVOLJSTVA).

U Muslimovom Sahihu se bilježi hadis od Ebu Hurejre r.a. da je rekao: "Ko krene putem tražeći na njemu znanje, Allah dž.š. će mu olakšati put ka Džennetu. Nijedna skupina ljudi se ne okupi u jednoj od Allahovih kuća (džamija), učeći Allahovu knjigu i međusobno je proučavajući, a da se na njih ne spusti spokoj, obaspe ih Allahova milost, okruže ih meleki i Allah ih spomene među onima koji su kod Njega, a koga djela unazade porijeklo mu neće koristiti. (Komentar Muslimovog Sahiha od Newewija, 17/24)

9. GRADNJA DŽAMIJA (MESDŽIDA)

U Buharijinom Sahihu se prenosi od Osmana ibn Affana da je čuo Poslanika s.a.v.s. kako kaže: "Ko sagradi džamiju (mesdžid), želeći time Allahovo lice (zadovoljstvo), Allah će mu sagraditi istu u Džennetu". (Fethul-bari, 1/544).

10. LIJEP AHLAK (PONAŠANJE)

Kaže Poslanik s.a.v.s.: “Ja garantujem kuću u dnu Dženneta onome ko ostavi prepirku pa makar bio u pravu, i garantujem kuću u sred Dženneta onome ko ostavi laž pa makar se šalio, i garantujem kuću u vrhu Dženneta, onome ko ima lijep ahlak (ponašanje).” (bilježe Ebu Davud i ed-Dija', Sahihul-džami', 1464)

Kaže Poslanik s.a.v.s.: “Ono što će najviše uvesti ljude u Džennet je bogobožnost i lijep ahlak (ponašanje), a ono što će ih najviše uvesti u vatru (Džehennem) je jezik i stidno mjesto.” (izvor prethodno naveden)

U lijep ahlak (ponašanje) ulaze mnoge stvari, koje je Aiša r.a. sažeto navela, kada je bila upitana o ahlaku (ponašanju) Poslanika s.a.v.s.: “Njegov ahlak (ponašanje) je bio Kur'an.” (bilježe Muslim, Ahmed i ostali).

Poslanik s.a.v.s. je naš uzor i Allah dž.š. ga pohvaljuje Svojim riječima: Jer, ti si, zaista, najljepšeg ahlaka (ćudi). (El-Kalem,3)

Pogledajmo Allahovu knjigu i Sunnet Njegova Poslanika s.a.v.s., njegov životopis (siru) i životopis njegovih ashaba (drugova) r.a., da bi naučili šta je to lijep ahlak i kako ga postići.

Od najboljih knjiga koje govore o vrlinama Poslanika s.a.v.s., i njegovom ahlaku je knjiga: Muhtesaru-š-šemailil-muhamedije, Vrline Allahovog Poslanika od Imama Tirmizije (Allah mu se smilovao), koju je skratio i izvršio korekciju šejh Muhammed Nasirud-din Albani.

11. OSTAVLJANJE PREPIRKE

Kaže Poslanik s.a.v.s.: “Ja garantujem kuću u dnu Dženneta onome ko ostavi prepirku pa makar bio u pravu,....” (izvor prethodno naveden)

12. OSTAVLJANJE LAŽI PA MAKAR I U ŠALI

Poslanik s.a.v.s. kaže: “Ja garantujem kuću u dnu Dženneta onome ko ostavi prepirku pa makar bio u pravu, i garantujem kuću u sred Dženneta onome ko ostavi laž pa makar i u šali, ...” (izvor prethodno naveden).

13. BITI STALNO POD ABDESTOM (TAHARET) I KLANJATI DVA REKATA IZA SVAKOG EZANA.

Bilježi Imam Tirmizija u svom Sunenu, el-Hakim i Ibn Huzejme u svom Sahihu od Abdullaha ibn Burejde, a on od svog oca r.a. da je rekao: “Jedno jutro Poslanik s.a.v.s. je rekao Bilalu: “Bilale, čime si me pretekao u Džennet? Jučer sam ušao u Džennet i ispred sebe sam čuo tvoje korake.”

Bilal odgovori: “Božiji Poslaniče; nikada nisam proučio ezan a da nisam klanjao dva rekata, i nikada nisam izgubio abdest a da ga nisam ponovo uzeo.” Allahov Poslanik s.a.v.s. mu reče: “S tim si me pretekao” (Sahihut-Tergib vet-Terhib, 194).

14. ODLAZAK U MESDŽID RADI OBAVLJANJA NAMAZA I POVRATAK IZ NJEGA

Bilježe Imami Muslim i Buharija u svojim Sahihima, i drugi, od Ebu Hurejre r.a. da je Poslanik s.a.v.s. rekao: “Kad god neko ode u džamiju, - jutrom ili naveče - Allah mu

pripremi mjesto u Džennetu (NUZULEN) koliko god puta ode ujutro ili naveče” (komentar Muslimovog Sahiha od Newewija, 5/ 176)

Imam Newewi u komentaru ovog hadisa: “Allah mu pripremi mjesto (NUZULEN), kaže, da je to ono što se pripremi kad dolaze gosti.

15. MNOGO ČINITI SEDŽDU ALLAHU DŽ.Š.

Bilježi Imam Muslim u svom Sahihu od Rebia‘ ibn Ka‘ba el-Eslemija da je rekao: “Jedne prilike sam noćio kod Poslanika s.a.v.s. pa sam mu pomogao da uzme abdest i izvrši svoje potrebe, pa mi reče: “Traži!” Ja mu odgovorih: “Tražim da budem uz tebe u Džennetu. On upita: “Ili tražiš nešto drugo?” Ja mu rekoh: “To je ono što tražim.”

Poslanik na kraju reče: “Pomozi se protiv svog nefsa mnogo čineći sedždu.” (komentar Muslimovog Sahiha od Newewija 4/451)

16. PRIMLJEN HADŽDŽ (HADŽDŽ MEBRUR)

Poslanik s.a.v.s. kaže: “Ko obavi hadždž, pa ne bude govorio bestidne riječi i ne bude griješio, vratit će se (bez grijeha) kao na dan kada ga je majka rodila”. (bilježi Buharija i drugi, Fethul-bari, 3/382).

Također Allahov Poslanik s.a.v.s. kaže: “Hadždž mebrur (to je hadždž na kojem hadžija nije činio grijeha), za njega nema druge nagrade osim Dženneta” (bilježe Imam Ahmed i Taberanija, Sahihul-džami‘, 3170).

17. UČENJE AJETUL-KURSIJJE IZA SVAKOG FARZA

Od Ebu Umame el-Bahilija r.a. se prenosi da je rekao: “Poslanik s.a.v.s. je rekao: “Ko prouči Ajetul-kursijj nakon svakog farza, između njega i ulaska u Džennet se ispriječava samo smrt.” (Nesaija, Ibn es-Sunni i ostali, Silsiletu-l-ehadisus-sahiha, 972)

Postoje i drugi zikrovi, za koje je, ako ih čovjek s ubjeđenjem izgovori, obećan Džennet, kao naprimjer: dž.š. Buharijinom Sahihu se bilježi hadis od Šeddada ibn Evsa r.a. da je Poslanik s.a.v.s. rekao: “Sejjidul-istigfar (najbolja dova za oprost grijeha) je da kažeš: “Allahu, Ti si moj Gospodar, nema boga osim Tebe, stvorio Si me i ja sam Tvoj rob, ja sam na tragu zavjeta i obećanja Tebi datog, u okviru mojih mogućnosti. Utječem Ti se od zla koje sam počinio, priznajem Ti Tvoje blagodati prema meni i priznajem Ti svoje grijeha, pa mi oprost, jer grijeha ne oprašta niko osim Tebe”, zatim je rekao: “Ko danju prouči ovaj istigfar, ubjeđen u to, pa umre toga dana prije nego što omrkne, bit će od stanovnika Dženneta, a ko to isto kaže noću, ubjeđen u to, pa umre prije nego svane, bit će od stanovnika Dženneta.” (Fethul-bari - 11/97)

18. KLANJATI DVANAEST REKATA (SUNNETA) SVAKI DAN I NOĆ, KAO DOBROVOLJNI NAMAZ ALLAHU DŽ.Š.

Od Ummi Habibe r.a. se prenosi da je Resulullah s.a.v.s. rekao: “Ko u jednom danu i noći klanja dvanaest rekata (sunneta), bit će mu sagrađena kuća u Džennetu: četiri rekata prije podne i dva poslije, dva rekata poslije akšama, dva rekata poslije jacie i dva rekata prije sabaha.” (bilježi Tirmizija, Sahihul-džami‘, 6362).

19. ŠIRENJE SELAMA, HRANJENJE GLADNIH, ODRŽAVANJE RODBINSKIH VEZA, I KLANJANJE NOĆU

Kaže Poslanik s.a.v.s.: “O ljudi, širite selam, hranite gladne, održavajte rodbinske veze i klanjajte noću dok ljudi spavaju pa ćete spokojno (sa selamom) ući u Džennet.” (bilježe Ibn Madždže i ostali, Sahih Sunen Ibn Madždže, 1097)

20. ISKRENOST U GOVORU, ISPUNJAVANJE OBEĆANJA, IZVRŠAVANJE EMANETA, ČUVANJE STIDNOG MJESTA, OBARANJE POGLEDA (OD ONOGA U ŠTO JE HARAM GLEDATI) I ČUVANJE RUKU (OD ZABRANJENIH STVARI).

Od Ubade ibn es-Samita se prenosi da je Poslanik s.a.v.s. rekao: “Garantujte mi šest stvari od vas, ja ću vam garantovati Džennet; kada govorite budite iskreni, ispunite kada obećate, izvršite kada vam se nešto povjeri, čuvajte vaša stidna mjesta, obarajte poglede i čuvajte svoje ruke (od zabranjenih stvari). (bilježe Ibn Huzejme, Ibn Hibban, el-Hakim i drugi, a Albani kaže da je hasen, es-Silsiletu-l-ehadis-u-s-sahiha, br. 1470)

21. OBAVLJANJE PET DNEVNIH NAMAZA, ONAKO KAKO JE ALLAH NAREDIO, POSTITI MJESEC RAMAZAN, ČUVANJE STIDNOG MJESTA I POKORNOST MUŽU.

(OVAJ UZROK JE POSEBNO ZA ŽENE)

Bilježi Ibn Hibban u svom Sahihu od Ebu Hurejre r.a. da je Allahov Poslanik s.a.v.s. rekao: “Ako žena bude klanjala pet dnevnih namaza, postila mjesec Ramazan, čuvala stidno mjesto i bila pokorna svome mužu, bit će joj rečeno: “Uđi u Džennet, na koja hoćeš vrata. (Sahihul-džami‘ , 660).

22. ODGAJATI I IZDRŽAVATI TRI KĆERKE ILI TRI SESTRE

Ebu Ja‘la u svom Musnedu bilježi od Enesa r.a. da je rekao: “Poslanik s.a.v.s. je rekao: “Ko bude imao tri kćeri ili tri sestre, pa se bude bojao Allaha i brinuo se o njihovom odgoju i izdržavao ih, bit će sa mnom u Džennetu, ovako, pa je sastavio kažiprsti i srednji prst.” (Silsiletul-ehadis-u-s-sahiha, 295)

U Muslimovom Sahihu i Tirmizijinom Sunenu (4/281), u njegovoj formi, se bilježi hadis u kojem je Poslanik s.a.v.s. rekao: “Ko bude izdržavao dvije kćerke i brinuo se o njima, ući će sa mnom u Džennet kao što su ova dva, pa je to pokazao sa svoja dva prsta.”

23. STRPLJIVOST I OČEKIVANJE NAGRADE PRI SMRTI DJECE I BLISKIH OSOBA

Kaže Poslanik s.a.v.s.: “Kome umre troje (djece) od njegova potomstva, a on bude za to očekivao nagradu (od Allaha), ući će u Džennet.” Jedna žena reče: “A šta je sa dvoje?” Poslanik odgovori: “I dvoje” (bilježe Nesaija i Ibn Hibban, Sahihul-džami‘ , 5969)

Također Poslanik s.a.v.s. kaže: “Nema roditelja kojima umre troje djece, koja nisu punoljetna, a da ih Allah dž.š. svojom dobrotom i milošću prema toj djeci, ne uvede u Džennet.” (bilježe Imami Ahmed, Nesaija i Ibn Hibban, Sahihul-džami‘ , 5781)

Bilježi Imami Ahmed u svome Musnedu od Ebu Hurejre r.a. da je Poslanik s.a.v.s. rekao: “Allah dž.š. kaže: “Mom robu mu'minu, kada mu uzmem nekog bliskog na dunjaluku, i on

za to očekuje nagradu, nema druge nagrade kod Mene osim Džennet.” (Sahihul-džami‘, 8139).

24. IZDRŽAVANJE I BRIGA O JETIMU (SIROČETU)

Bilježi Imam Buharija u svom Sahihu od Sehla ibn Sa‘da, da je Poslanik s.a.v.s. rekao: “Ja i onaj, ko se bude brinuo o jetimu (siročetu), bit ćemo u Džennetu ovako, pa je sastavio svoj kažiprst i srednji prst.” (Fethul-bari, 10/436).

25. OBILAZAK BOLESNIKA I POSJETA (ZIJARET) BRATU PO VJERI

Od Ebu Hurejre r.a. se prenosi da je Poslanik s.a.v.s. rekao: “Ko obiđe bolesnika ili posjeti svoga brata po vjeri, zovnut će ga glasnik: “Blagoslovljen neka si i neka je blagoslovljen tvoj hod, nastani mjesto u Džennetu.” (bilježe Tirmizija i Ibn Madždže, a Albani kaže hasen, Sahihul-džami‘, 6387).

Kaže Poslanik s.a.v.s.: “Ko posjeti bolesnika, on je u džennetskom bostanu sve dok se ne vrati (iz posjete). (bilježi Muslim, Newewi 16/361)

26. ČUVANJE DVAJU SVOJSTAVA (VRLINA).

Od Abdullaha ibn ‘Amra r.a. se prenosi da je Poslanik s.a.v.s. rekao: “Svaki rob musliman koji bude čuvao dvije osobine ili dva svojstva ući će u Džennet. Ta svojstva su lahka, ali malo ih radi po njima. Iza svakog namaza reći deset puta subhanallah, deset puta elhamdulillah, i deset puta Allahu ekber. To je stotinu i pedeset jezikom, a hiljadu i petsto na vagi (mizanu). I kada legne proučiti 34 puta Allahu ekber, 33 puta elhamdulillah i 33 puta subhanallah. To je stotinu jezikom a hiljadu na vagi (mizanu).”

Vidio sam Allahovog Poslanika s.a.v.s. kako to uči, brojeći na prste svoje ruke. Upitali su ga: “Božiji Poslaniče, kako su te osobine lahke, a malo ih po njima radi?” On odgovori. “Nekom od vas će doći šejtan kada legne i uspavat će ga prije nego to prouči, a dolazit će mu i u namazu, pa će ga podsjećati na nešto prije nego to prouči.” (bilježe ga Ebu Davud, Tirmizija i kaže: “hadis hasen sahih”, Nesaija i Ibn Hibban u svom Sahihu, Sahihut-tergib, 603).

27. VELIKODUŠNOST U KUPOPRODAJI

Bilježi Imam Buharija u et-Tarihul-kebir, Nesaija i ostali od Osmana ibn Affana r.a. da je rekao: “Poslanik s.a.v.s. je rekao: “Allah dž.š. će uvesti u Džennet onog čovjeka koji je velikodušan i kao mušterija i kao prodavač, i kao onaj koji vraća dug i kao onaj kome se vraća.” (Silsiletul-ehadisus-sahiha, 1181)

28. OPROSTITI DUG ONOME KOME JE TEŠKO DA GA VRATI

Bilježi Imam Muslim (Allah mu se smilovao) u svom Sahihu od Huzejfe ibnul-Jemana, a on od Poslanika s.a.v.s. da je jedan čovjek umro i ušao u Džennet, pa mu je rečeno: “Šta si činio?”

On reče: ”Trgovao sam s ljudima pa sam odgadao dug onome kome je teško da ga vrati i opraštao sam dugove u novcu i imetku.” (komentar Muslimovog Sahiha, od Newewija, 10/483)

Također se bilježi u Muslimovom Sahihu od Ebu Hurejre da je Allahov Poslanik s.a.v.s. rekao: “Bio je jedan čovjek koji je ljudima posuđivao (imetak) i govorio bi svome

momku: Ako ti dođe onaj kome je teško da vrati dug pa mu ga ti oprostiš, možda i Allah tebi oprosti.” Sreo je Allaha dž.š. (umro) pa mu je oprostio.” (Komentar Muslimovog Sahiha od Newewija 10/485)

29. GRUPA DOBRIH DJELA, AKO SE U JEDNOM DANU NAĐU KOD MUSLIMANA, UĆI JE, ALLAHOVOM DOBROTOM, U DŽENNET.

Bilježi Imam Muslim u svom Sahihu od Ebu Hurejre da je Poslanik s.a.v.s. rekao: “Ko je od vas jutros zapostio?” “Ja”, reče Ebu Bekr. Poslanik dalje upita: “Ko je pratio dženazu?” “Ja”, reče Ebu Bekr.

Poslanik: “Ko je danas nahranio siromaha?” “Ja”, reče Ebu Bekr. Poslanik: “Ko je od vas danas posjetio bolesnika!”

“Ja”, reče Ebu Bekr. Na to Poslanik s.a.v.s. reče: “U koga se nađu ova djela u jednom danu, ući će u Džennet.” (komentar Muslimovog Sahiha od Newewija, 15/164)

30. SABUR (STRPLJIVOST) AKO SE IZGUBI VID

Od Ebu Hurejre se prenosi da je Poslanik s.a.v.s. rekao: “Allah dž.š. kaže: “Kome uzmem dva miljenika (oči), pa se strpi, očekujući nagradu, nisam zadovoljan da ga nagradim ičim drugim osim Džennetom.” (Bilježi Tirmizija, Sahihul-džami‘, 8140)